

Thessalonika khan Logot Paul He Likha Duitio Chithi

Salam Kotha

¹ Paul, aru Silvanus* aru Timothy,
Thessalonika sheher laga girja ke likhi ase,
juntu Baba Isor aru Probhu Jisu Khrista te ase.

² Apnikhan logote amikhan laga Baba Isor
laga anugrah aru Probhu Jisu Khrista laga
shanti thakibi.

Dhanyavad Prathana

³ Amikhan hodai apnikhan nimite Isor ke
dhanyavad dibo lage, bhai khan. Etu thik ase,
kele koile apnikhan laga biswas bisi dangor hoi
kene jai ase, aru apnikhan sob ekjon-ekjon
nimite morom thaka to bisi hoi ase.

⁴ Etu nimite amikhan nijor pura mon khushi
kori kene apnikhan laga kotha Isor laga girja ke
koidi ase. Apnikhan ke dukh kosto diya homoi
te apnikhan kineka dhorjo korise aru biswas te
thakibo parise etu laga kotha khan koidi ase.
Apuni khan dukh kosto te dhorjo kora to
amikhan koi thake.

Khrista Aha Dinte Bisar

⁵ Etu Isor laga dharmikta pora kora bisar laga
sakhi ase, kele koile etu nimite he apuni to Isor
laga rajyo karone yogya ase, jun nimite apuni
khan bhi dukh kosto pai ase.

* **1:1** Silas laga dusra naam.

⁶ Kelemanee, kun pora apnikhan ke dukh kosto diye, taikhan ke Isor pora he dukh kosto dibo, eneka kora to Isor nimite dharmikta dikha ase,

⁷ aru jun khan amikhan logote dukh te ase, sob nimite aram pabo. Etu hobo jitia Probhu Jisu Tai laga mohan sorgodoth khan logote akas te ulaikena ahibo[†].

⁸ Juli thaka jui pora Tai jun khan Isor ke najane aru Probhu Jisu laga susamachar ke mana nai taikhan uporte saja dibo[‡].

⁹ Taikhan anonto homoi laga nosto te sajah pabo aru Isor aru Tai laga mohima thaka takot pora dur hoi jabo[§].

¹⁰ Tai eitu khan koribo jitia Tai laga pobitro khan logot stuti pabole wapas ahibo, aru Taike biswas kora khan Taike saikene asurit hobo. Kilekoile amikhan laga etu gawahi kora kotha ke apnikhan biswas korise^{*}.

¹¹ Etu nimite amikhan hodai apnikhan karone prathana kori thake, amikhan laga Isor pora apnikhan ke mata to yogya hoi thaki bole. Amikhan etu he prathana kori ase Tai pora apnikhan laga bhal kaam laga itcha thaka sob pura kori dibo karone aru biswas laga kaam khan pura hokti pora hobole karone.

¹² Amikhan laga Probhu Jisu laga mohima apnikhan laga jibon te dikhibo nimite prathana kore, aru Tai pora apnikhan ke stuti kori dibo, etu sob hobo amikhan Isor aru Probhu Jisu

[†] **1:7** John 1:14-15; Rev. 14:13. [‡] **1:8** Psalms 79:6; Isaiah 66:15; Jeremiah 10:25. [§] **1:9** Rev. 21:8; Matthew 25:41, 46; Isaiah 2:19, 21. ^{*} **1:10** 1 The. 2:3; 1 Cor. 1:6; Psalm 89:7; Isaiah 49:3.

Khrista laga anugrah nimite†.

2

Kanun Bhangai Diya Ekjon

¹ Etiya bhai khan, Probhu Jisu Khrista wapasa aha aru amikhan Taike lok kori bole joma kora laga kotha pora,

² apnikhan Probhu laga din asol pora ahi jaise bhabikena apnikhan mon ulta pulta nabhabi bhi, aru mon dukh nohoile manu laga kotha pora nohoile atma laga kotha nohoile amikhan laga chithi nimite apnikhan laga mon dukh na koribi.

³ Kun manu pora bhi apnikhan ke thogabole nadibi. Kilekoile etu laga din nahibo, jitia tak niyom bhanga ekjon, kun nosto laga chokra* ase, kun he Isor laga kotha ke ninda kore, tai ahi najai.

⁴ Etu tai he ase jun nijorke uthai diye aru Isor laga naam aru Isor ke aradhana kori bole thaka ki ase sobke bhirodh kore. Etu pora, tai Isor laga mondoli te jai kene ta te bohi jai aru nijorke Isor koi kene dikhai†.

⁵ Apnikhan monte nai naki, jitia ami apuni khan logote thakise, etu homoi te etu kotha khan koi dise nohoi?

⁶ Taike ki pora rukhai ase apnikhan jani loise, aru taike thik homoi te he dikhai dibo.

⁷ Kilekoile bujhi bo napara laga niyom nathaka age pora kaam shuru hoise, khali ta te

† 1:12 Isa. 24:15; 66:5; 1 Pet. 1:7-8. * 2:3 Etu Saitan ase. † 2:4 Eze. 28:2; Dan. 11: 36-37.

ekjon ase jun he taike etiya rukhai kene ase jitia tak taike rasta pora ulai nadiye.

⁸ Titia niyom nathaka ekjon ke janai dibo, junke Probhu Jisu pora Tai laga saas pora morai dibo. Aru Probhu wapasa ahibole laga din prokahit janai diya pora taike khotom kori dibo[‡].

⁹ Etu niyom nathaka ekjon aha to Saitan laga biya kaam pora he ase, aru tai pora kisim-kisim sakti pora chihna khan dikha bo, aru asurit kaam misa pora dikhai dibo,

¹⁰ adharmikta laga misa pora he eitu khan sob koribo. Etu manu khan sob mori jai ase kele koile taikhan nijorke bachai lobo paribole thaka hosa laga morom to taikhan luwa nai.

¹¹ Etu karone Isor pora taikhan ke galti thaka laga kaam pathai dise, titia taikhan etu misa ke biswas koribo.

¹² Etu pora he taikhan sob uporte bisar anibo, jun khan hosa ke biswas kora nai, aru, ulta, adharmik kaam khan te khushi pai thakise.

Mojbut Hoi Khara Hobi

¹³ Isor pora morom kora bhai khan, apnikhan nimate Isor ke hodai amikhan dhanyavad di thakibo lage. Kilekoile apuni khan ke Pobitro Atma pora sapha kori luwa aru hosa ke biswas kori luwa karone Isor apuni khan ke poritran dibole basi loise[§].

¹⁴ Isor pora amikhan koi diya susamachar pora apuni khan ke mati loise, apuni khan Probhu Jisu Khrista laga mohima pabo nimate.

[‡] 2:8 Job 4:9; Isa. 11:4. [§] 2:13 Eph. 1:4-5; 1 Pet. 1:1-5; Deu. 33:12.

¹⁵ Etu nimite, bhai khan bhal pora khara thakibi, prochar kora aru amikhan laga chithi pora ki to sikhai dise, eitu khan bhal pora dhori kene thakibi.

¹⁶ Etiya amikhan laga Probhu Jisu Khrista nijor, aru Isor amikhan laga Baba jun amikhan ke morom korise, aru Tai laga anugrah dwara amikhanke hodai thaka mon aram aru bhal asha dise,

¹⁷ etu pora apnikhan ke bhal kotha aru bhal kaam kori bole uthai thakibo dibi.

3

Amikhan Nimite prathana Koribi

¹ Aru bhai khan, amikhan nimite prathana koribi, titia Probhu laga kotha to sob jagate joldi punchibo aru Tai laga naam untcha hobo, jineka apnikhan logote hodai hoi ase.

² Biya aru paapi khan logot pora amikhan ke bachai loi lobole prathana kori dibi, kele koile biswas to sob logote nai.

³ Kintu Probhu to hosa ase, Tai he apuni ke arubi khara kori dibo aru biya jon* pora bachai lobo.

⁴ Kintu amikhan Probhu dwara apnikhan uporte pura biswas ase, apnikhan juntu kaam kori ase etu hodai kori thakibo.

⁵ Aru Probhu he apuni laga mon to Isor laga morom aru Khrista laga dhoro te apuni laga ke mon rakhi thakibo.

Alsi Nimite Hoshiar Hob

* **3:3** Etu Saitan ase.

⁶ Etiya bhai khan, Probhu Jisu Khrista laga naam te apnikhan ke hukum di ase, alsi thaka aru amikhan sikhai diya namani kene thaka khan pora dur thakibi.

⁷ Aru amikhan jani ase apnikhan bhi amikhan nisena koribo, kele koile jetia apnikhan majote amikhan thakise, etu homoi te amikhan alsi kora nai.

⁸ Amikhan kun laga bhi poisa nadikena bhat khai diya nai. Hoilebi amikhan din rath dukh paikene kaam korise, kele koile apnikhan uporte khang dibole itcha thaka nai.

⁹ Amikhan logote adhikar nathaka karone nohoi, hoilebi nije he kaam kori kene apuni khan ke buja bole korise, eneka hoile apuni khan bhi amikhan nisena koribo.

¹⁰ Kilekoile apnikhan logote thaka somoite amikhan etu koise, “Kaam nakora manu khabo nalage.”

¹¹ Kilekoile amikhan huni ase ta te kunba apnikhan majote eku bhi kaam nakori kene, misa-misi kotha koi kene berai thake.

¹² Etu manu khan ke Probhu Jisu Khrista laga naam pora amikhan utsah kori ase, nijor kaam kori kene khabi.

¹³ Hoilebi, bhai khan, ki bhal kaam ase etu kori bole alsi nohobi.

¹⁴ Kintu jodi kunba manu chithi te koi diya kotha khan namanile, taike bhal pora sai thakibi aru tai logote namilibi, titia tai sorom lagibo.

¹⁵ Kintu taike dushman nisena nabhabi bhi, hoilebi ekjon bhai nisena samjhai dibi.

Hekh Kotha

¹⁶ Etiya, shanti laga Probhu Tai nije apuni
khan ke shanti dibi sob homoi te. Probhu
apnikhan sob logote thakibi.

¹⁷ Etu ami laga salam ase, moi Paul, moi nije
hath pora likhi ase, juntu sob chithi te moi laga
dagi dise. Eneka he moi likhe.

¹⁸ Amikhan laga Probhu Jisu Khrista laga
anugrah sob logote hodai thakibo dibi.

**Indian Standard Version (ISV) Nagamese
The New Testament in the Naga Pidgin language of
India: Indian Standard Version (ISV) Nagamese**

copyright © 2019 Bridge Connectivity Solutions

Language: Nagamiz (Naga Pidgin)

Contributor: Bridge Connectivity Solutions Pvt. Ltd.

This translation is made available to you under the terms of the
Creative Commons Attribution Share-Alike license 4.0.

You have permission to share and redistribute this Bible translation in
any format and to make reasonable revisions and adaptations of this
translation, provided that:

You include the above copyright and source information.

If you make any changes to the text, you must indicate that you did
so in a way that makes it clear that the original licensor is not
necessarily endorsing your changes.

If you redistribute this text, you must distribute your contributions
under the same license as the original.

Pictures included with Scriptures and other documents on this site are
licensed just for use with those Scriptures and documents. For other
uses, please contact the respective copyright owners.

Note that in addition to the rules above, revising and adapting God's
Word involves a great responsibility to be true to God's Word. See
Revelation 22:18-19.

2023-04-14

PDF generated using Haiola and XeLaTeX on 11 Jun 2026 from source
files dated 23 Apr 2023

302d590c-b57a-5734-9dcb-8a22ed7685c4